

ذابلة ورود الهواشم بالجفاف
چنها سبع اسنين يوسف بالعجاف
و الحرم صاحت دخيلك بو الفضل
ياسگاي - جيب الماي

كل ورود احسين تزهي كبرياء
من جبينه اتشعشع ابهالة ضياء
وردة وحدة كاسي غرتها الحياء
هذي زينب من سلالة انبياء
نادت العباس ياراعي الوفاء
اگصد الهاي الورد و أسگيها ماء
وردة وردة اتساگطت في كربلاء
بهل خريف الحل عليها ابهل بلاء

و الگمر شگ السما ابوجهة يهل
و الحرم صاحت دخيلك بو الفضل
ياسگاي - جيب الماي

و صاحت الحورا يسبع الگنظره
ذبلت اوراقني و غصوني مكسّره
و ياسحابة جود و عدك ننظره
وهالورد رادت لجودك تمظره
طاحت ورود الهواشم عالثره
و هذا يومك بالبطولة اتسطره
اتشابه ابزودك شمائل حيدر
و يالتواعد و الوعيدك تحضره

و لو نخيتك حاشي يا خويا تضل
و الحرم صاحت دخيلك بو الفضل
ياسگاي - جيب الماي

و محلا لورود ابخضار و زاهيات
احنا من طيب السلالة الزاكيات
و يّلي تروينا ابدموع الجاريات
خذها رخصة و أنطلق خويا بثبات
و هذا عبدالله كُرب ليه الممات
خويا شيل الجود و أكصد للفرات
و غال يا زينب يفخر الطاهرات
و الله خلي الجيش يتناثر شتات

سكنة جتّه و شايلة خوها الطفل
و الحرم صاحت دخيلك بو الفضل
يا سگّاي - جيب الماي

و حدّر السگّاي صوفگ بالرجال
مَلَك الحومة و على كيفه النزال
و ضاگت الوسعة عليهم لا مجال
شردة ماكو صارت أگرب للخيال
مختبص صار العدو يمنى و شمال
و أبو فاضل للنهر شدّ الرحال
و شبح ابعينه النهر گّله تعال
بالخجل ليه اعتنى بمائة الزلال

أبو الأكبر للگمر ضل يستهل
و الحرم صاحت دخيلك بو الفضل
يا سگّاي - جيب الماي

بزغ ابنوره الكمر شافه الحسين
و شاف شايل بيده الماي المعين
صاح ربي يسلم الخويا اليدين
و لكن العسكر بدا ايعد الكمين
مر على النخلة وفگد ايده اليمين
و صاح ' فدوة الدين ' ثابت باليقين
گطعوا اشماله و ضل واگف حزين
و لن سهم بالعين جاله من لعين

و ابعموده جاله شيطان و نذل
و الحرم صاحت دخيلك بو الفضل
ياسگاي - جيب الماي

من وگع عباس و ابفيض الدمه
جته تتلقاه ويلي فاطمه
جاله بو السجاد و ادمعة همه
ظهره مكسور الولي و يكلمه
موقف اهتزت إله أرض و سمه
ولعنت ابموته العصابة المجرمه
و الورد تبجي ندى و تترحمه
من فگد عباس هاين هالضمه

تذبل الوردات تروى بالوصل
و الحرم صاحت دخيلك بو الفضل
ياسگاي - جيب الماي